

CONVENIO DE COLABORACIÓN ENTRE O SERVIZO GALEGO DE SAÚDE E O CONCELLO DE SAN CIBRAO DAS VIÑAS PARA A APERTURA DUN NOVO CONSULTORIO MÉDICO EN REBOREDO-CONCELLO DE SAN CIBRAO DAS VIÑAS

Na data da sinatura dixital

REUNIDOS

Dunha parte, **don Antonio Gómez Caamaño**, conselleiro de Sanidade e presidente do Servizo Galego de Saúde, organismo autónomo adscrito á dita consellería, actuando en nome e representación deste último, no exercicio das facultades que lle veñen atribuídas no artigo 34 da Lei 1/1983, do 22 de febreiro, de normas reguladoras da Xunta e da súa Presidencia, e de conformidade co establecido no Decreto 145/2024, do 20 de maio, polo que se establece a estrutura orgánica do Servizo Galego de Saúde, na Lei 1/2016, do 18 dexaneiro, de transparencia e bo goberno, así como na Lei 40/2015, do 1 de outubro, de réxime xurídico do sector público.

E doutra parte, **dona Marta Novoa Iglesias**, actuando en nome e representación do Concello de San Cibrao das Viñas (CIF P3207600B), en virtude da súa condición de alcaldesa-presidenta da citada corporación, segundo o disposto no artigo 21.1 da Lei 7/1985, do 2 de abril, reguladora das bases de réxime local, o artigo 61.1 da Lei 5/1997, do 22 de xullo, de administración local de Galicia e o artigo 41.1 do Real decreto 2568/1986, do 28 de novembro, polo que se aproba o Regulamento de organización, funcionamento e réxime xurídico das entidades locais.

As partes intervenientes recoñécense capacidade legal para outorgar o presente convenio, e para estes efectos,

EXPOÑEN

I. O artigo 1 do Decreto 144/2024, do 20 de maio, polo que se establece a estrutura orgánica da Consellería de Sanidade, determina que esta é o órgano da Administración autonómica responsable da superior dirección e control da execución da política da Xunta de Galicia en materia de saúde, planificación e asistencia sanitaria e farmacéutica, así como do exercicio das competencias da Xunta de Galicia para asegurar á cidadanía o dereito á protección da saúde.

Así mesmo, o artigo 1 do Decreto 145/2024, do 20 de maio, polo que se establece a estrutura orgánica do Servizo Galego de Saúde, determina que este é o organismo

autónomo de natureza administrativa adscrito á Consellería de Sanidade, configurado para o axeitado desenvolvemento das competencias que no ámbito sanitario lle corresponden á Comunidade Autónoma de Galicia.

II. Os convenios entre administracións públicas constitúen o elemento adecuado para desenvolver a súa cooperación en cuestións de interese común, tal e como establecen o artigo 57 da Lei 7/1985, do 2 de abril, e o artigo 198 da Lei 5/1997, do 22 de xullo.

III. Neste senso, é preciso optimizar os recursos económicos das administracións públicas mediante fórmulas innovadoras que permitan a xestión compartida na prestación dos servizos públicos que, neste caso, se concreta no presente convenio de colaboración.

IV. A fin de dar unha mellor resposta aos problemas de saúde da poboación, mediante actuacións que permitan mellorar as dotacións e infraestruturas adicadas á atención asistencial á cidadanía no concello, faise necesario abrir un novo consultorio médico en Reboredo-Concello de San Cibrao das Viñas.

V. Tal e como se pon de manifesto na documentación achegada polo concello, as instalacións nas que se atopa o actual consultorio médico de San Cibrao das Viñas fóronse deteriorando co paso do tempo sen que existan posibilidades de acometer a súa reforma e acondicionamento. Por este motivo, resulta necesario, adquirir un novo inmovible, acondicionalo e facer as xestións necesarias para destinalo a tal fin.

VI. O Servizo Galego de Saúde considera que o concello é a entidade idónea para a percepción desta axuda de carácter singular e excepcional por razóns de interese público, non sendo posible promover a concorrència pública dada a necesidade de garantir á poboación do citado concello a continuidade na prestación do servizo público esencial de asistencia médica, no nivel de atención primaria, en instalacións localizadas dentro do termo municipal, permitindo facer efectivo así o principio de achegamento de medios diagnósticos e terapéuticos ás necesidades da poboación afectada.

A achega económica será obxecto de concesión directa, xa que logo de ver o expresado anteriormente, a especificidade das características e da actividade referida, ligada á idea de colaboración cun fin de interese público fan imposible a efectividade do principio de concorrència na concesión da achega económica.

Por tal motivo, dado o interese público, social e humanitario das actividades obxecto do convenio que se pretende asinar, e o seu carácter singular inherente á propia existencia da necesidade de atención sanitaria á poboación do concello, non procede a realización de convocatoria pública.



VII. O interese público de colaboración no desenvolvemento da presente actuación radica en dar unha mellor resposta aos problemas de saúde da poboación, mediante actuacións que permitan mellorar as dotacións e infraestruturas adicadas á atención asistencial á cidadanía no concello.

VIII. Conscientes da dita necesidade, as partes intervenientes acordan unir os seus esforzos para acadar o obxectivo sinalado. Por iso, e a fin de levar adiante as citadas actuacións para a adquisición e acondicionamento dun novo consultorio médico, é necesaria a concorrencia de vontades de ambas as dúas partes interesadas, polo que é preciso determinar o contido da dita colaboración.

Á vista do anterior, as partes asinantes acordan outorgar o presente convenio de colaboración de acordo coas seguintes

CLÁUSULAS

Primeira. *Obxecto*

O presente convenio ten por obxecto establecer as bases da colaboración entre o Servizo Galego de Saúde e o Concello de San Cibrao das Viñas para a adquisición e acondicionamento dun inmovible co fin de destinalo a consultorio médico.

O citado inmovible localízase no baixo do edificio número 12 do Acceso ao Polígono de Reboredo, no Concello de San Cibrao das Viñas, a súa referencia catastral é 5927506NG9852N0021EO e conta cunha superficie útil de 336,68 m² (local) + 51,17 m² (altillo).

Segunda. *Compromisos do Servizo Galego de Saúde*

O Servizo Galego de Saúde obrígase a:

Financiar a adquisición do citado inmovible por parte do Concello de San Cibrao das Viñas, cun importe total de 214 500 € con cargo á aplicación orzamentaria 5001 412B 760.0, proxecto 2022 00001, na que existe crédito axeitado e suficiente.

A subvención comprenderá o valor de adquisición do ben inmovible máis o iva correspondente, ata a contía máxima total que se sinala no apartado anterior. O restantes gastos correrán por conta do concello.

O Servizo Galego de Saúde non asume ningunha obriga nin compromiso de acondicionamento do espazo que se adquire.



Terceira. *Compromisos do concello*

O concello obrígase a:

1. Adquirir o inmovible identificado na cláusula primeira, sendo da súa conta os gastos derivados das operacións xurídicas que deriven da compravenda, sen prexuízo do previsto na cláusula segunda, así como levar a cabo as actuacións necesarias para a correcta execución das obras de acondicionamento co fin de destinalo a consultorio médico (redacción de documento técnico necesario para a execución das obras, licitación e execución destas).
2. Obter os permisos, autorizacións e acreditacións necesarias para executar as obras e destinar o inmovible a consultorio médico, cumprindo cos requirimentos necesarios para a súa autorización como centro sanitario.
3. Cumprir os requisitos para obter a condición de beneficiario establecidos no artigo 10 da Lei 9/2007, do 13 de xuño, de subvencións de Galicia.
4. Consonte o establecido no artigo 27.5 da Lei 9/2007, do 13 de xuño, o concello asume, na súa condición de beneficiario, a total responsabilidade ante o Servizo Galego de Saúde, da execución da actividade subvencionada. Tamén se compromete a requirirlle aos contratistas a obriga de colaboración para o exercicio das funcións de control previstas no artigo 45 da citada lei.
5. Facilitar, se fose o caso, toda a información que lle sexa requirida pola Intervención Xeral da Comunidade Autónoma, polo Tribunal de Contas e polo Consello de Contas de Galicia no exercicio das súas funcións de fiscalización e control do destino das axudas obxecto do presente acordo.
6. Comunicar ao Servizo Galego de Saúde, se fose o caso, a alteración nas condicións tidas en conta para a concesión da axuda obxecto deste convenio e, en todo caso, a obtención concorrente de subvencións ou axudas outorgadas por outras administracións, entes públicos ou privados, nacionais ou internacionais para os efectos de propoñer, se procedera, a modificación das condicións establecidas neste convenio.
7. Comunicar ao Servizo Galego de Saúde a data de adquisición do inmovible e de recepción das obras para os efectos de que este envíe un representante se así o estima oportuno.



Cuarta. Requisitos

De acordo co establecido no artigo 4 do Decreto 193/2011, do 6 de outubro, polo que se regulan especialidades nas subvencións ás entidades locais galegas, será requisito para a concesión desta subvención directa que o concello cumprise co deber de remisión ao Consello de Contas da súa conta xeral.

Quinta. Xustificación e pagamento

A xustificación dos gastos e o seu pagamento realizarase nos termos establecidos na Lei 9/2007, do 13 de xuño, de subvencións de Galicia, no Decreto 11/2009, do 8 de xaneiro, polo que se aproba o Regulamento da citada Lei, e no Decreto 193/2011, do 6 de outubro, polo que se regulan as especialidades nas subvencións ás entidades locais galegas.

Non se prevén anticipos da cantidade subvencionada.

O concello xustificará a subvención mediante a presentación da seguinte documentación:

1. Certificación da intervención ou do órgano que ten atribuídas as facultades de control da toma de razón en contabilidade do gasto realizado para a adquisición do inmovible e do cumprimento da finalidade para a que foi concedida.

A data límite para a xustificación do gasto realizado para a adquisición do inmovible será o 16 de decembro de 2024.

2. Certificación expedida pola secretaría da entidade local, co visto e praxe da alcaldesa, relativa á aprobación polo órgano competente da conta xustificativa da subvención na que se faga constar, como mínimo, de forma detallada:

- O cumprimento da finalidade da subvención.
- Os gastos totais imputables á actuación subvencionada, coa identificación do acredor/a, número de factura, data de emisión e data de recoñecemento da obriga polo órgano competente.
- Os documentos acreditativos dos gastos realizados con recursos propios.
- Unha relación detallada doutros ingresos ou subvencións que financiasen a actividade subvencionada, coa indicación do importe e a súa procedencia, de ser o caso.
- Acreditación do cumprimento das obrigas tributarias, coa Seguridade Social, e de non ter pendente de pagamento ningunha débeda coa administración pública da comunidade autónoma de conformidade co establecido nos artigos 10 e 11 do Decreto 11/2009, do 8 de xaneiro.
- Declaración responsable da obtención doutras subvencións, axudas, ingresos ou recursos que financien as actuacións subvencionadas.



3. No caso de que o gasto xustificado polo concello non acadase a contía total dasubvención prevista na cláusula segunda, o Servizo Galego de Saúde só achegará o importe da cantidade efectivamente xustificada.

De conformidade co establecido no artigo 3.1 do Decreto 193/2011, do 6 de outubro, con carácter xeral, considerarase gasto realizado cando se teña contabilizado o recoñecemento da obriga polo órgano competente da entidade local. A entidade local beneficiaria estará obrigada a acreditar documentalmente a efectividade dos pagamentos realizados no prazo máximo de sesenta días naturais contados a partir da data do ingreso na conta bancaria da beneficiaria de cada un dos aboamentos da subvención concedida.

Sexta Comisión de seguimento

Coa finalidade de asegurar o bo fin e cumprimento do obxecto deste convenio, constituirase unha comisión de seguimento á que corresponderán as seguintes funcións:

1. Impulsar e avaliar o cumprimento do presente convenio, proponendo as actuacións que se consideren precisas para tal fin.
2. Interpretar en caso de dúbida o contido do mesmo.
3. Proponer ás partes a resolución das posibles controversias que puideran xurdir na súa aplicación.

A comisión estará formada por un total de catro persoas, das cales, dúas serán designadas polo Servizo Galego de Saúde, e dúas serán designadas polo Concello. A competencia para esta designación correspóndelle ao/á máximo/a responsable de cada unha das partes asinantes do convenio.

A comisión reunirse a solicitude dunha das partes, considerándose constituída coa asistencia de, como mínimo, unha persoa representante de cada entidade asinante.

As cuestións litixiosas xurdidas da interpretación, desenvolvemento e aplicación do convenio serán resoltas polo Servizo Galego de Saúde, poñendo os seus acordos fin á vía administrativa. Contra estes acordos poderase interpoñer recurso contencioso-administrativo ante o Tribunal Superior de Xustiza de Galicia, de conformidade co disposto na Lei 29/1998, do 13 de xullo, reguladora da xurisdición contencioso-administrativa.



Sétima. *Natureza do convenio*

Este convenio ten natureza administrativa, rexéndose polas cláusulas que nel se establecen e, no seu defecto, polo regulado na Lei 9/2007, do 13 de xuño, de subvencións de Galicia, no Decreto 11/2009, do 8 de xaneiro, polo que se aproba o Regulamento da lei de subvencións de Galicia e na Lei 38/2003, do 17 novembro, xeral de subvencións e demais normas de procedente aplicación.

Oitava. *Compatibilidade*

Esta axuda é compatible coa obtención doutras subvencións, axudas, ingresos ou recursos doutras entidades para a mesma finalidade procedentes de calquera Administración ou entes públicos ou privados, nacionais, da Unión Europea ou de organismos internacionais, sempre que a contía total das axudas non supere o 100% do importe da actividade subvencionada. No caso de que a subvención concedida supere, illadamente ou en concorrencia con outras, o custo da actividade para a que foi concedida a subvención, descontarase o exceso obtido sobre o citado custo.

Novena. *Revogación, reintegro e resolución*

A axuda concedida ao amparo deste convenio poderá ser obxecto de revogación ou reintegro, xunto cos xuros de demora, cando concorran as circunstancias previstas nos artigos 32 e 33 da Lei 9/2007, do 13 de xuño, nos artigos 74 e seguintes do Decreto 11/2009, do 8 de xaneiro, e na Lei 38/2003, do 17 novembro.

Será causa de reintegro total o incumprimento das obrigas establecidas para o concello nas cláusulas deste convenio, no que se refire ao compromiso íntegro acadado por aquel de adquisición e acondicionamento dun inmovible co fin de destinalo especificamente a consultorio médico.

En todo caso, será causa de extinción deste convenio a inviabilidade da realización da actuación por causas non imputables ás partes. Así mesmo, será causa de extinción a denuncia por causas de interese público a instancia de calquera das partes asinantes.

Décima. *Publicidade*

A sinatura deste convenio suporá o consentimento expreso das partes asinantes para incluír e facer públicos os datos persoais que consten no convenio e mailo resto de especificacións contidas no mesmo, de conformidade co artigo 15 da Lei 1/2016, do 18 de xaneiro, de transparencia e bo goberno e o Decreto 126/2006, do 20 de xullo, polo que se regula o rexistro de convenios da Xunta de Galicia. O Servizo Galego de Saúde publicará no Diario Oficial de Galicia e na páxina web oficial o importe da axuda concedida.



Así mesmo, en cumprimento do disposto no artigo 20 da Lei 38/2003, do 17 de novembro, a información requirida será comunicada á Base de Datos Nacional de Subvencións (BDNS).

Decimo primeira. Vixencia

O presente convenio entrará en vigor o día da súa sinatura e estenderá a súa vixencia ata o remate das obras de acondicionamento do inmovible e a posta en marcha do consultorio coa data límite, en todo caso, do 31 de decembro de 2025, podendo ser prorrogado, de conformidade co previsto no artigo 49 h) da Lei 40/2015, do 1 de outubro, por acordo unánime das partes.

En proba de conformidade con canto antecede, asinan o presente convenio na data da súa sinatura dixital.

Polo Servizo Galego de Saúde

Polo Concello de San Cibrao das Viñas

Antonio Gómez Caamaño

Marta Novoa Iglesias

